

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće
Broj: 01/1-28-Z/19
Kakanj, 28.03.2019. godine

Z A P I S N I K

sa 28. redovne sjednice Općinskog vijeća održane 28.03.2019. godine (četvrtak) u velikoj sali za sastanke Općinskog vijeća sa početkom u 9:00 sati (sažetak zapisnika)

Nakon intoniranja himne Bosne i Hercegovine, 28. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bečirhodžić, Adnan Ibrahimspahić, Mejrema Purišević, Izudin Hrusto, Amar Selimović, Safet Šahman, Nadina Kovač, Senad Alajbegović, Namir Talić, Edin Aliefendić, Muhamed Kubat (naknadno pristupio) (**SDA**)

Jasmin Mušanović i Mugdin Gorak (**SBB BiH**)

Rešad Merdić, Zerina Kovač, Fahrudin Buza, Mirsad Tursum i Adisa Škulj (naknadno pristupila) (**S BiH**)

Enes Piljug, Eldin Mijoč i Ahmed Begić (naknadno pristupio) (**SDP BiH**)

Slaven Katičić i Ivica Petrović (**HDZ BiH**)

Elvedin Delić (naknadno pristupio) (**A-SDA**)

Nusret Muslić, Evelin Bitić, Semir Mušija, Mirnes Merdić i Rizah Haračić (**samostalni vijećnici**)

Mujo Fafulić (**nacionalna manjina**)

Predsjedavajući je konstatovao da je na sjednici u momentu prijave prisutno 26 vijećnika i vijećnica, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Aldin Šljivo, općinski načelnik

Enver Kusić, sekretar organa uprave

Mirza Fazlić, pomoćnik općinskog načelnika za privredu, urbanizam i zaštitu okoline

Džihad Berbić, pomoćnik općinskog načelnika za finansije

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurčo Kurtović, pomoćnik općinskog načelnika za imovinskoppravne, geodetske poslove i katastar nekretnina

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice

Nurudin Hrusto, pomoćnik općinskog načelnika za civilnu zaštitu

Zijad Neimarlija, direktor Zavoda za planiranje i izgradnju općine Kakanj

Izjave, obrađivači, gosti:

Mirnes Bajtarević, direktor JP „Grijanje“

Haris Veispahić, direktor JP „Vodokom“

Predstavnici medija:

NTV IC Kakanj
Radio Kakanj
„Kakanjske novine“

„Naša riječ“
„Kakanjlive“
„Kakanj-x“

„Kaportal“
„Klix portal“

Kratka saopćenja o radu sjednice i prethodnim pitanjima.

a) Izvješće o realizaciji Okvirnog programa rada Općinskog vijeća za 2018. godinu

Kolegij je Izvješće o realizaciji Okvirnog programa rada Općinskog vijeća za 2018. godinu uputio Vijeću na dalje razmatranje i usvajanje.

b) Molba MZ Bičer u vezi sigurnosti saobraćaja

Kolegij će od nadležnih kojima je Molba upućena, uključujući i Policijsku stanicu tražiti informaciju o poduzetim aktivnostima u vezi sigurnosti saobraćaja.

c) Zahtjev JP „Grijanje“ doo Kakanj za financiranjem iz Programa utroška sredstava zaštite okoliša ili drugih programa

Zahtjev je Kolegij primio k znanju.

d) Inicijativa Naše stranke za imenovanjem pješačke zone u ulici Alije Izetbegovića – Šetalištem 8. mart

Kolegij je Inicijativu prosljedio Komisiji za utvrđivanje naziva novih ulica Općine Kakanj.

e) Zahtjev Službe za financije za preispitivanjem visine transfera političkim partijama

Zahtjev je primljen k znanju.

f) Odgovor Zavoda na zaključak Kolegija Općinskog vijeća u vezi rasvjetnog tijela na željezničkoj stanici u Čatićima

Odgovor je Kolegij prosljedio podnosiocima inicijative.

Usvajanje zapisnika sa 27. sjednice Općinskog vijeća:

Predsjedavajući je zapisnik sa 27. sjednice Općinskog vijeća stavio na glasanje, te je isti usvojen jednoglasno sa 23 glasa za.

Komentari na dostavljene odgovore na vijećnička pitanja:

Enes Piljug: je rekao da je dobio jedan odgovor na vijećničko pitanje u vezi obezbjeđivanja uslova za nesmetan prelazak regionalne ceste za učenike iz naselja Rošćevina i Popare. U odgovoru Kantonalne direkcije za ceste ZDK se navodi da ne postoje odgovarajući sigurnosni uslovi za prelazak preko regionalne ceste učenika iz navedenih naselja do škole u Donjem Kaknju. Zbog toga je tražio od Službe za privredu, kojoj je vijećničko pitanje bilo upućeno, da se izjasni da li će i kada biti obezbjeđen prevoz u školu za učenike iz Rošćevine i Popara, obzirom da je trenutna pozicija autobuske stanice udaljenija od škole u odnosu na navedena naselja.

Mirza Fazlić: je rekao se ne može tražiti odgovor na postavljeno pitanje od Službe za privredu, obzirom da su iste stvari u nadležnosti Kantona, da Općina samo sufinansira prevoz učenika, te da postoji niz dozvola i procedura koje se moraju ispoštovati da bi se eventualno obezbjedio prevoz za navedene učenike.

Eldin Mijoč: je rekao da je na prošloj sjednici Vijeća postavio dva pitanja, te je dobio odgovor na jedno, dok na pitanje da li su u vrijeme Izborna 2018. godine, postojale i bile izdate potrebne urbanističke i druge saglasnosti za postavljanje bilborda u ulici 311. lahke brigade kod skretanja za bivši DC, nije dobio odgovor. U odgovoru koji je dobio nije na prvo pitanje stoji da je za počinjene prekršaje u vrijeme Izborna 2018. godine, od strane općinske komunalne inspekcije kažnjeno šest političkih stranaka i jedno fizičko lice. Rekao je da nije zadovoljan odgovorom jer nije tražio podatak da li je neko kažnjen, nego koje su to političke partije. Također, rekao je da u odgovoru stoji da u vrijeme prijevremenih Izborna 2019. godine, nisu izrečene kazne bilo kome, što smatra da nije uredu jer su isti prekršaji od strane političkih partija počinjeni u vrijeme oba predizborna perioda. Tražio je da mu se odgovori da li je SDA kažnjena zbog istaknutih slika svojih kandidata na bilbordima u ulici 311. lahke brigade kod skretanja za bivši DC, kao što je kažnjen SDP za iste stvari za bilborde koji se nalaze nedaleko od pomenutih, te je tražio da se slike sa istih bilborda uklone.

Rizah Haračić: je rekao da je dobio odgovor na jedno od dva pitanja sa prethodne sjednice i to odgovor na pitanje u vezi izgradnje bloka 8 u TE Kakanj. JP „Elektroprivreda BiH“ navodi da sagledavaju rizike i efekte gradnje tog bloka, što smatra da nije tačno, jer postoje već urađene analize i izrađeni projekti koji govore o opravdanosti gradnje istog, ali smatra da se zbog raznih drugih stvari prednost daje drugim općinama, odnosno infrastrukturnim projektima u tim općinama i da se blok 8 TE Kakanj neće nikada graditi. Na drugo pitanje vezano za realizaciju obaveze odsumporavanja bloka 7 i drugih blokova u TE Kakanj, je rekao da nije dobio odgovor.

Komentari na dostavljena mišljenja na vijećničke inicijative:

Enes Piljug: je rekao da je imao dvije inicijative. Prva se odnosila na izgradnju novog vodozahvata u Kučićima i na istu je dobio odgovor od Zavoda za planiranje gdje se kaže da bi učešće MZ u navedenom projektu bilo da obezbjedi projektnu dokumentaciju, što je bila praksa i u drugim MZ kad se radilo o sličnim projektima sa čime se slaže, kako bi se što prije stvorili preduslovi za realizaciju projekta. Odgovor na drugu inicijativu je dobio od Službe za privredu u kojem stoji da je upućen zahtjev Agenciji za vodno područje rijeke Save za izradu projekta za gradnju betonskog potpornog zida uz obalu rijeke Bosne u naselju Malješ. U skladu s tim je predložio da se predmetni zid gradi od cementarskog mosta do pilane „Silvestra“, obzirom da taj dio naselja obično bude poplavljen u slučajevima izlivanja rijeke Bosne.

Vijećnička pitanja:

Enes Piljug: je postavio dva vijećnička pitanja, prvo: šta je sa projektima koji su predati u Općinu Kakanj, a koji čekaju na realizaciju osam i više godina, odnosno hoće li ikada ti projekti doći na red za realizaciju i drugo: zbog čega nije završen projekat oko izgradnje novog vodozahvata i novog dovodnog cjevovoda za mjesto Varalići.

Adnan Ibrahimspahić: je postavio dva vijećnička pitanja i to koje mjere je poduzela Kantonalna uprava za šumarstvo ZDK u 2018. godini na zaštiti šuma od bespravne eksploatacije na području općine Kakanj, te na kojim lokalitetima su evidentirane značajnije ili veće bespravne sječe. Drugo pitanje je u kojem statusu odnosno kategorizaciji se nalazi put kroz naseljeno mjesto „Malješ“ i koje aktivnosti je moguće poduzeti da ovaj put dobije odgovarajuću kategorizaciju, a time i nosioca upravljanja, održavanja i dr.

Jasmin Mušanović: je postavio pitanje može li se i kada očekivati popravak ceste koja vodi na Plandište, jer smatra da je put znatno oštećen i to od rudničke kapije pa dalje, te ga je neophodno popraviti.

Predsjedavajući je konstatovao da su vijećnici Mugdin Gorak i Mujo Fafulić iskoristili pravo na vijećničko pitanje bez korištenja govornice.

Vijećničke inicijative:

Safet Šahman: je podnio vijećničku inicijativu da se ukine odluka o naplati štete u slučaju služnosti, a vezano za izrade projekata u mjesnim zajednicama. Radi se o tzv. štetama ukoliko se koriste dijelovi puteva kojima gospodari ŠPD, a predmetnom odlukom se vrši naplata štete za zemljište koje često i nije u vlasništvu ili pod upravom ŠPD-a, jer se radi o putevima koji su javno dobro.

Enes Piljug: je podnio dvije vijećničke inicijative, prvu da se izvrši rekonstrukcija dva mosta u mjestu Podborje iz razloga bezbjednosti prelaza preko istih, a radi se o dva manja mosta dužine na glavnom putu Kakanj-Podborje, za čiju rekonstrukciju nisu potrebna velika finansijska sredstva i drugu da se pomogne projekat završetka kanalizacije u mjestu Kamen, na način da se nabavi građevinski materijal. Potrebno im je oko 500m cijevi, kako bi se spojili sa Hausovićima i na taj način riješili problem kanalizacije, a sva dosadašnja ulaganja su vršili iz vlastitih sredstava.

Semir Mušija: je podnio vijećničku inicijativu da se u što skorijem roku izvrši uklanjanje objekta bivši „Željeznički dom“ i da se taj prostor učine sigurnim kako za korisnike željezničkog prevoza, tako i za okolno stanovništvo. Navedeni objekat više od deset godina je devastiran i ne služi svrsi, isti je postao

mjesto za odlaganje raznog otpada, mjesto koje je potencijalni izvor raznih zaraznih oboljenja, a zbog ruševnog stanja prijete opasnost od potpunog urušavanja objekta i mogućeg prouzrokovanja štete, kako stanovništvu MZ Bičer, tako i svakodnevnim putnicima.

Predsjedavajući je konstatovao da je vijećnik Mugdin Gorak iskoristio pravo na vijećničku inicijativu bez korištenja govornice.

Utvrđivanje dnevnog reda:

Predsjedavajući je predložio dnevni red koji je usaglašen na sjednici Kolegija 20.03.2019. godine, odnosno koji je u pozivu za 28. sjednicu Vijeća.

Predsjedavajući je rekao da je na Kolegiju dogovoreno da zbog brojnosti i obimnosti materijala koji je došao u pripremi sjednice, sjednica Vijeća traje dok se vijećnici ne zamore, a one tačke dnevnog reda koje ne budu obrađene na ovoj sjednici biće obrađene na nastavku iste na kojoj će se naći i materijali pristigli nakon održanog Kolegija.

U raspravi po predloženom dnevnom redu su učestvovali: Edin Aliefendić i Rešad Merdić.

Edin Aliefendić: je predložio da se na 28. sjednici Vijeća raspravlja o Odluci o visini subvencioniranja odvoza komunalnog otpada iz udaljenih MZ, koja je u Službu za poslove OV pristigla nakon održanog Kolegija, a iz razloga što je ista direktno vezana za tačku Program utroška namjenskih sredstava za zaštitu okoline Općine Kakanj za 2019. godinu, odnosno kako bi se određene stavke iz Programa mogle implementirati.

Rešad Merdić: je predložio da se u dnevni red za sjednicu uvrste i materijali koji su naknadno došli, a iz razloga što je na Kolegiju usaglašeno da će u svakom slučaju predmetna sjednica zbog obimnosti materijala biti održana u dva dijela.

Predsjedavajući je dao pauzu od 5 minuta.

Nakon pauze predsjedavajući je predložio novi dnevni red od 20 tačaka i to na način da se 20. tačka predloženog dnevnog reda sa Kolegija prebaci na prvu tačku, dok redoslijed ostalih tačaka ostaje ne promjenjen, te je rekao da je usaglašeno da se na današnjoj sjednici raspravlja 20 tačaka, a preostale tačke iz prvobitnog prijedloga dnevnog reda će se raspravljati na 29. sjednici Vijeća, zajedno sa svim materijalima koji su pristigli nakon Kolegija. U raspravi po predloženom dnevnom redu nije niko učestvovao, te je Vijeće sa 28 glasova za, bez glasova protiv i uzdržan usvojilo dnevni red za 28. sjednicu.

Usvojeni dnevni red:

1. Prijedlog zaključka o davanju saglasnosti na Elaborat o procjeni šteta nastalih od prirodne nesreće usljed poplava i klizanja zemljišta uzrokovanih obilnim padavinama i topljenjem snijega
2. Prijedlog odluke o dodjeli 15. aprilskih priznanja
3. Izvještaj o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2018. godinu i sredstava od prodaje poslovnih prostora i zemljišta
4. Prijedlog programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2019. godinu i sredstava od prodaje poslovnih prostora i stanova
5. Prijedlog programa utroška namjenskih sredstava za zaštitu okoline Općine Kakanj za 2019. godinu
6. Izvještaj o realizaciji Strategije razvoja Općine Kakanj za 2018. godinu
7. Prijedlog akcionog plana za 2019. godinu revidirane Strategije razvoja Općine Kakanj 2007-2020
8. Izvještaj o realizaciji Programa utroška sredstava od koncesionih naknada za 2018. godinu
9. Prijedlog programa utroška sredstava od koncesionih naknada za 2019. godinu
10. Izvještaj o realizaciji Plana redovnog održavanja javnih i nerazvrstanih cesta na području općine Kakanj za 2018. godinu

11. Prijedlog plana redovnog održavanja javnih i nerazvrstanih cesta na području općine Kakanj za 2019. godinu
12. Izvještaj o realizaciji Programa utroška sredstava od građevinskog zemljišta za 2018. godinu
13. izvještaj o realizaciji Programa utroška sredstava od komunalne naknade za 2018. godinu
14. Prijedlog programa utroška sredstava od komunalne naknade za 2019. godinu
15. Prijedlog odluke o davanju na privremeno korištenje poslovnih prostora
16. Prijedlog programa rasporeda sredstava boračkim udruženjima za 2019. godinu 1
17. Prijedlog programa rasporeda sredstava boračkim udruženjima za 2019. godinu 2
18. Prijedlog programa rasporeda sredstava za sport za 2019. godinu
19. Izvještaj o realizaciji i utrošku sredstava ostvarenih po osnovu naknade za vatrogastvo u 2018. godinu
20. Prijedlog programa rasporeda i utroška planiranih sredstava od naknada za vatrogastvo u 2019. godini

Tačka 1.

Prijedlog zaključka o davanju saglasnosti na Elaborat o procjeni šteta nastalih od prirodne nesreće usljed poplava i klizanja zemljišta uzrokovanih obilnim padavinama i topljenjem snijega

Predlagač: Općinski načelnik

Obrađivač: Komisija za procjenu šteta od prirodnih i drugih nesreća, Služba civilne zaštite

Izjavitelji: Dženan Rahman, predsjednik Komisije i Nurudin Hrusto, pomoćnik općinskog načelnika

U diskusiji nije niko učestvovao i Vijeće je Zaključak o davanju saglasnosti na Elaborat o procjeni šteta nastalih od prirodne nesreće usljed poplava i klizanja zemljišta uzrokovanih obilnim padavinama i topljenjem snijega usvojilo jednoglasno sa 28 glasova za.

Tačka 2.

Prijedlog odluke o dodjeli 15. aprilskih priznanja

Predlagač: Komisija za dodjelu 15.aprilskih priznanja

Obrađivač: Stručna služba za poslove Općinskog vijeća

Izjavitelji: Nadina Kovač, član Komisije

U diskusiji je učestvovao Eldin Mijoč.

Eldin Mijoč: je podržao prijedlog odluke, odnosno kandidata za dodjelu priznanja i rekao da svaka osoba zaslužuje da se nađe na predmetnoj listi, te je sugerisao da bi predložena lista dobitnika iz formalnih razloga trebala biti potpisana od strane članova Komisije. Na kraju je iskazao zadovoljstvo što je predsjedavajući Općinskog vijeća predložen za dobitnika Grba općine Kakanj, te je tražio da predsjedavajući kaže vijećnicima zbog čega ne prisustvuje svečanosti polaganja cvijeća prilikom obilježavanja značajnih datuma, nego polaganje cvijeća obavlja u ime Vijeća neko drugi.

Predsjedavajući je rekao da nije vrijeme da se javno govori na predmetnu temu, te da isto nije vezano za tačku dnevnog reda.

Vijeće je usvojilo Odluku o dodjeli 15. aprilskih priznanja, kojom je Grb općine Kakanj dodijelilo Slavenu Katičiću, Plaketu sa diplomom: Harfidu Hadroviću, „Elektrovar” d.o.o. Kakanj i Hamzi Frljku (posthumno), Zahvalnice: Marini Kovač, Mirsadu Mujagiću, Salihi i Mensudu Veispahić, Zijadu Skopljakoviću i Mirnelu Hadroviću sa 23 glasa za, 3 protiv i niko uzdržan.

Tačka 3.

Izvještaj o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2018. godinu i sredstava od prodaje poslovnih prostora i zemljišta

Predlagač: Općinski načelnik

Obrađivač: Služba za finansije

Izjavitelji: Džihad Berbić, pomoćnik općinskog načelnika

U diskusiji je učestvovao Safet Šahman.

Safet Šahman: je naglasio da se iz Izvještaja vidi da jedanaest stavki iz Programa, a koje se tiču projekata za područje Brnjica nisu realizovane, pa je tražio da se o tome povede računa u tekućoj godini.

Vijeće je nakon rasprave Izvještaj o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2018. godinu i sredstava od prodaje poslovnih prostora i zemljišta usvojilo sa 23 glasa za, 3 protiv i 1 uzdržan.

Tačka 4.

Prijedlog programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2019. godinu i sredstava od prodaje poslovnih prostora i stanova

Predlagač: Općinski načelnik

Obrađivač: Služba za finansije

Izjestilac: Džihad Berbić, pomoćnik općinskog načelnika

U diskusiji su učestvovali: Jasmin Mušanović, Eldin Mijoč, Enes Piljug, Semir Mušija, Safet Šahman i Evelin Bitić.

Jasmin Mušanović: je predložio da se u predmetnom programu nađe stavka pomoći u liječenju oboljelim građanima općine Kakanj, obzirom da ima veliki broj građana koji boluju od bolesti koje su direktna posljedica rada termoelektrane. Rekao je da bi to bilo humano i da bi se o tome trebalo razmišljati ako ne u tekućoj budžetskoj godini, onda obavezno u narednoj.

Eldin Mijoč: je predložio da se u Program uvedu dvije nove stavke i to rekonstrukcija ceste od Stare jame do gradske deponije i ceste od pijace do picerije „Nanda“

Enes Piljug: je predložio da se iz sredstava rezervi izdvoji iznos od 6.000 KM za rasvjetu u Podborju i tražio je obrazloženje utroška sredstava za izgradnju igrališta u Kučićima, jer smatra da postoji nesrazmjer u uloženim sredstvima koja iznose cca 21.364 KM i urađenom poslu na tom projektu.

Semir Mušija: je istakao da sumnja da će projekti iz Programa biti realizovani imajući u vidu prenesene obaveze iz prethodne godine, te je tražio pojašnjenje stavke 33. koja se odnosi na sufinansiranje projekta rekonstrukcije elektroinstalacija u samostanu Kraljeva Sutjeska obzirom da u Izvještaju stoji da je u prethodnoj godini realizovano 50% sredstava, odnosno 20.000 KM, a sada u Programu stoji iznos od 50.000 KM za realizaciju tog projekta.

Safet Šahman: je istakao zadovoljstvo projektima iz Programa, te je napomenuo po pitanju rasvjete u Podborju da osim što je planiran mali iznos sredstava za predmetni projekat nisu pribavljene potrebne dozvole i saglasnosti, a što se ne može obezbjeđiti dok elektrodistribucija ne završi posao rekonstrukcije niskonaponske mreže.

Evelin Bitić: je predložio da se iz rezervnih sredstava izdvoji iznos za zamjenu rasvjetnih tijela na javnoj rasvjeti u naselju Malješ.

Džihad Berbić: je pojasnio da prijedlog vijećnika Mušanovića nije moguće podržati iz razloga što je zakonom propisano za koju namjenu se mogu trošiti predmetna sredstva i to su uglavnom infrastrukturni projekti i projekti za poboljšanje uslova života. Što se tiče prijedloga vijećnika Mijoča rekao je da će se rekonstrukcije navedenih cesta obaviti u skorije vrijeme iz sredstava drugih programa, dok je po pitanju traženih obrazloženja za vijećnika Piljuga predložio da se očituje Zavod, obzirom da on ima detaljne informacije i podatke sa terena za svaki pojedinačni projekat. Na pitanje vijećnika Mušije je odgovorio da su u prethodnoj godini bila planirana sredstva za sanaciju korita rijeke Trstionice u Kraljevoj Sutjesci koja nisu realizovana, te je u tekućoj godini promjenjena namjena tim sredstvima, te su preusmjerena za sanaciju doma u Kraljevoj Sutjesci i završetak radova rekonstrukcije elektroinstalacija u samostanu.

Jasmin Mušanović: je rekao da se ne slaže sa odgovorom na izneseni prijedlog, te je naglasio da smatra da se zdravlje pojedinca i društva u cjelini po definiciji smatra kvalitetom života, pa je u skladu s tim ostao kod prijedloga da se iz Programa izdvoje sredstva za pomoć oboljelim građanima Kaknja.

Vijeće je nakon diskusije usvojilo Program utroška neraspoređenog dijela namjenskih sredstava od prihoda preduzeća ostvarenih radom termoelektrana za 2019. godinu i sredstava od prodaje poslovnih prostora i stanova sa 24 glasa za, 2 protiv i 2 uzdržana.

Tačka 5.

Prijedlog programa utroška namjenskih sredstava za zaštitu okoline Općine Kakanj za 2019. godinu

Predlagač: Općinski načelnik

Obradivač: Služba za privredu, urbanizam i zaštitu okoline

Izjestilac: Mirza Fazlić, pomoćnik općinskog načelnika

Stav i mišljenje: Komisija za ekologiju

U diskusiji su učestvovali: Semir Mušija, Enes Piljug, Safet Šahman, Evelin Bitić, Eldin Mijoč, Amar Selimović i Rizah Haračić.

Semir Mušija: je predložio da se umjesto projekta pod brojem 7. izvrši izgradnja sportskih poligona u dvije MZ. Pitao je koliko se sredstava za ovu namjenu očekuje sa viših nivoa vlasti. Dalje je predložio da se izdvoje veća sredstva za rekonstrukciju mreže daljinskog grijanja, kako bi se stekli uslovi za proširenje mreže grijanja. Što se tiče realizacije projekta izgradnje azila za pse, rekao je da smatra da se nisu stekli uslovi za tako nešto i predložio je da se prije svega izvrši popis svih pasa, odnosno vlasnika istih, kako bi se sačinio jedinstveni registar pasa, pa da je tek potom opravdana izgradnja azila. U tom pravcu je predložio da se za ovaj projekat pokušaju obezbjediti sredstva sa viših nivoa vlasti ili od međunarodnih organizacija. U vezi projekta rekonstrukcije izletišta Bukovica je rekao da bi bilo neophodno ovo izletišta, kao i sva buduća koja se namjeravaju graditi, dati na upravljanje, odnosno gazdovanje nekome, kao na primjer MZ, kako bi se ista zaštitila od uništavanja.

Eldin Mijoč: je predložio da se održi tematska sjednica Vijeća u vezi problematike oko rekonstrukcije sistema daljinskog grijanja u Kaknju. Smatra da izdvajanja sredstava od 400-500 hiljada KM na godišnjem nivou neće dati značajan rezultat, jer će se tom dinamikom dugi niz godina vršiti rekonstrukcija, što znači da od proširenja mreže grijanja u skorije vrijeme neće biti ništa. S toga predlaže tematsku sjednicu na kojoj bi se zauzeli stavovi po ovom pitanju i utvrdili pravci i ciljevi djelovanja u dužem vremenskom periodu. Još je predložio uvođenje jedne stavke u Program, a to je sanacija potoka Slijevnice u istoimenom naselju, jer isti stvara značajne probleme mještanima, a njegova sanacija ne zahtjeva velika finansijska sredstva.

Enes Piljug: je predložio da se sa stavke 13. izdvoji iznos od 15.000 KM za čišćenje i uređenje obale rijeke Ribnice od Subotinja do kamenoloma „Trgošped“. Još je predložio da se povećaju sredstva za čišćenje divljih deponija i to u prvom redu da se očiste deponije uz korita i obale rijeka i potoka.

Safet Šahman: je tražio od predlagača da se u tabeli 3. stavka 1. ostavi mogućnost dogovora sa MZ oko realizacije projekata koji su prioritarniji.

Evelin Bitić: je tražio da mu se dostave izvještaji o realizaciji projekata edukacije stanovništva iz oblasti zaštite okoline, jer smatra da se velika sredstva izdvajaju za tu namjenu, a što je planirano i predmetnim Programom. Još je rekao da su mala sredstva planirana za čišćenje javnih deponija i volonterske akcije čišćenja.

Amar Selimović: je pohvalio projekat izgradnje izletišta na Bukovici i Tršču, te je sugerisao da se izletišta na Bukovici gradi po mogućnosti na lokaciji prije postrojenja za prečišćavanje vode.

Rizah Haračić: je rekao da je pohvalna stavka koja predviđa zamjenu krova na zgradi JU „Mladost“, te je predložio da se iz sredstava rezerve ili ukoliko ostane na nekoj stavci neutrošenih sredstava izvrši zamjena jednog ili dva prozora na istom objektu.

Mirza Fazlić: je pojasnio da se sredstva pod stavkom broj 9. dijele na sve škole na području općine, kao i da se sredstva za edukaciju dijele na sve nevladine organizacije u općini, tako da pojedinačni iznosi koji se dodjele nisu veliki. Po pitanju gradnje sportskih poligona je rekao da smatra da se isti ne trebaju graditi iz predmetnih sredstava, dok je u vezi rekonstrukcije mreže daljinskog grijanja rekao da je to tema za JP „Grijanje“. Po pitanju sanacije potoka Slijevnice je rekao da su sredstva za takve namjene planirana u Programu pod jednom od stavki, te da će se realizovati prema podnesenim zahtjevima iz MZ nakon izlaska na teren i utvrđivanja stanja od strane komisije. U vezi prijedloga za čišćenje obale rijeke Ribnice je rekao da će se svakako iz sredstava Programa, u okviru projekta uklanjanja divljih deponija, izvršiti obilazak obala svih kakanjskih rijeka i identifikovati kritične tačke koje će biti uređene. Još je rekao u vezi prijedloga vijećnika Šahmana da smatra da sredstva na predmetnoj stavci treba da ostanu kako je u Programu, a ukoliko se taj projekat završi iz nekih drugih sredstava, da je moguće da Vijeće naknadno donese odluku da se sredstva utroše na druge projekte prema prijedlogu MZ. Na prijedlog vijećnika Haračića je rekao da je u ovoj godini u planu zamjena krova na objektu JU „Mladost“ i ukoliko na nekoj stavci ostane viška sredstava moguće je nešto izdvojiti za stolariju na istom objektu, a ukoliko toga ne bude planira se u narednoj godini zamjena stolarija i uređenje fasade objekta.

Evelin Bitić: je pojasnio da nije stava da se edukacije učenika po školama ne provode, već smatra da je korisnije dio tih sredstava preusmjeriti na jednodnevne volonterske akcije učenika na čišćenju okoliša.

Semir Mušija: je ponovio da je mišljenja da je korisnije sredstva iz stavke 7. utrošiti na gradnju sportskih poligona i na taj način poboljšati kvalitet života mladih.

Mirza Fazlić: je zamolio vijećnike da prije nego što po određenoj temi diskutuju, da se prethodno informišu u samoj Službi, koja će im omogućiti uvid u svu raspoloživu dokumentaciju po svakom pojedinačnom projektu, odnosno po utrošku sredstava svake stavke pojedinačno.

Nakon diskusije Vijeće je usvojilo Program utroška namjenskih sredstava za zaštitu okoline Općine Kakanj za 2019. godinu sa 25 glasova za, 4 protiv i niko uzdržan.

Tačka 6.

Izveštaj o realizaciji Strategije razvoja Općine Kakanj za 2018. godinu

Tačka 7.

Prijedlog akcionog plana za 2019. godinu revidirane Strategije razvoja Općine Kakanj 2007-2020

Predlagač: Općinski načelnik

Obrađivač: Služba za privredu, urbanizam i zaštitu okoline

Izjestilac: Mirza Fazlić, pomoćnik općinskog načelnika

Stav i mišljenje: Komisija za ekologiju

Vijeće je vodilo objedinjenu raspravu o ovim dvjema tačkama.

U diskusiji su učestvovali: Senad Alajbegović, Semir Mušija i Jasmin Mušanović.

Senad Alajbegović: je predložio da se u Akcionom planu pod stavkom uređenje korita rijeke Zgošće i Trstionice doda i rijeka Ribnica, o čemu je već ranije bilo diskusije od strane vijećnika Piljuga.

Semir Mušija: je tražio pojašnjenje stavke iz Akcionog plana i pitao kojim programom je planirana izrada projektne dokumentacije glavnog vrelovoda, jer mu nije poznato da je isti bilo na Vijeću.

Jasmin Mušanović: je pitao može li se kroz Izveštaj o Strategiji vidjeti kolika je uspješnost zapošljavanja mladih u Općini Kakanj, odnosno sugerisao je da Općina u saradnji sa nadležnim ministarstvom izradi planove i programe za edukaciju, odnosno obrazovanje potrebnog kadra na tržištu rada.

Mirza Fazlić: se zahvalio na sugestiji vijećnika Alajbegovića i rekao da će provjeriti nejasnoće iznesene od strane vijećnika Mušije, te je po pitanju izrade programa obrazovanja rekao da bi već sada trebalo

pristupiti tim poslovima, kako bi se takve stvari planirale u narednoj Strategiji koja će se raditi, a potom i pratio efekat istih kroz Izvještaje.

Vijeće je usvojilo Izvještaj o realizaciji Strategije razvoja Općine Kakanj za 2018. godinu sa 24 glasa za, 4 protiv i 1 uzdržan, a Akcioni plana za 2019. godinu sa 26 glasova za, bez glasova protiv i 2 uzdržana.

Tačka 8.

Izvještaj o realizaciji Programa utroška sredstava od koncesionih naknada za 2018. godinu

Tačka 9.

Prijedlog programa utroška sredstava od koncesionih naknada za 2019. godinu

Predlagač: Općinski načelnik

Obradivač: Zavod za planiranje i izgradnju općine Kakanj

Izjestilac: Zijad Neimarlija, direktor Zavoda

Vijeće je objedinilo raspravu o ovim dvjema tačkama.

U diskusiji su učestvovali: Semir Mušija, Enes Piljug, Namir Talić i Evelin Bitić.

Semir Mušija: je ukazao na grešku u Programu gdje stoji da je potpisan ugovor o koncesijama sa RMU „Kakanj“, a poznato je da isti nije potpisan.

Enes Piljug: je pohvalio Program i izrazio nadu da će biti u cijelosti realizovan, te je pitao da li postoje potrebne saglasnosti od RMU „Kakanj“ za izgradnju puta Donji Kakanj-Kondžilo, kao i da se konkretnije kaže kad se očekuje uplata sredstava od strane RMU „Kakaknj“ po osnovu koncesija.

Namir Talić: je iznio sugestiju da se sredstva od koncesija ubuduće planiraju u najvećoj mjeri za MZ koje su najviše ugrožene usljed eksploatacije ruda, te je naglasio da nije uredu da MZ Brnj nije uvrštena ni u jedan projekat, a smatra da je jedna od najugroženijih MZ.

Evelin Bitić: je izrazio zadovoljstvo što je Programom predviđeno da se izvrši rekonstrukcija puteva u MZ Pope, te je pitao da li taj projekat podrazumjeva i rekonstrukciju ceste od džamije u Popima do cementarskog mosta, te da se u tom slučaju predvide sredstva za izgradnju trotoara uz tu cestu, radi lakšeg kretanja pješaka, naročito učenika.

Zijad Neimarlija: je rekao da je na posljednjem sastanku koji je održan između predstavnika općine i koncesionara iz doline rijeke Ribnice bilo govora o potpisivanju sporazuma između istih za gradnju puta za Brnjic i neupitno je da će RMU „Kakanj“ dati potrebne saglasnosti, jer će biti potpisnik tog sporazuma. Što se tiče trenutka naplate koncesione naknade je rekao da to zavisi od Vlade ZDK i Rudnika, odnosno da se to može očekivati tek po potpisu koncesionog ugovora, a li da plaćanje koncesije nije uslov za početak aktivnosti koje prethode samom poslu gradnje predmetnog puta. Saglasio se sa sugestijom vijećnika Talića da se sredstva u najvećoj mjeri trebaju ulagati u MZ gdje se vrši eksploatacija, te je istakao nadu da će se znatno više ulagati u te MZ nakon što Rudnik počne plaćati koncesiju. U vezi puta u MZ Pope kojeg je pominjao vijećnik Bitić je rekao da je u pitanju industrijski put u vlasništvu Hidrogranje, te da bilo kakvo ulaganju u njega se ne može vršiti bez konsultacija i saglasnosti vlasnika. Nakon diskusije Vijeće je usvojilo Izvještaj o realizaciji Programa utroška sredstava od koncesionih naknada za 2018. godinu sa 24 glasa za, 3 protiv i 1 uzdržan, a Program utroška sredstava od koncesionih naknada za 2019. godinu jednoglasno sa 29 glasova za.

Uslijedila je pauza u radu Vijeća od 1h.

Tačka 10.

Izveštaj o realizaciji Plana redovnog održavanja javnih i nerazvrstanih cesta na području općine Kakanj za 2018. godinu

Tačka 11.

Prijedlog plana redovnog održavanja javnih i nerazvrstanih cesta na području općine Kakanj za 2019. godinu

Predlagač: Općinski načelnik

Obradivač: Zavod za planiranje i izgradnju općine Kakanj

Izjavitelj: Zijad Neimarlija, direktor Zavoda

Vijeće je vodilo objedinjenu raspravu o ovim dvjema tačkama.

U diskusiji je učestvovao Safet Šahman.

Safet Šahman: je zamolio nadležne da izvrše sanaciju dijela puta za Brnjic, gdje je put na jednom dijelu veoma sužen zbog udara vodene bujice, a kad se steknu uslovi predložio je da se na predmetoj tački izgradi betonski zid kako bi se problem trajno riješio.

Vijeće je usvojilo Izveštaj o realizaciji Plana redovnog održavanja javnih i nerazvrstanih cesta na području općine Kakanj za 2018. godinu sa 22 glasa za, 3 protiv i 1 uzdržan, a Plan redovnog održavanja javnih i nerazvrstanih cesta na području općine Kakanj za 2019. godinu sa 25 glasa za, 3 protiv i bez glasova uzdržan.

Tačka 12.

Izveštaj o realizaciji Programa utroška sredstava od građevinskog zemljišta za 2018. godinu

Predlagač: Općinski načelnik

Obradivač: Zavod za planiranje i izgradnju općine Kakanj

Izjavitelj: Zijad Neimarlija, direktor Zavoda

U diskusiji nije niko učestvovao i Izveštaj o realizaciji Programa utroška sredstava od građevinskog zemljišta za 2018. godinu je usvojen sa 23 glasa za, 3 protiv i bez glasova uzdržan.

Tačka 13.

Izveštaj o realizaciji Programa utroška sredstava od komunalne naknade za 2018. godinu

Tačka 14.

Prijedlog programa utroška sredstava od komunalne naknade za 2019. godinu

Predlagač: Općinski načelnik

Obradivač: Zavod za planiranje i izgradnju općine Kakanj

Izjavitelj: Zijad Neimarlija, direktor Zavoda

Vijeće je vodilo objedinjenu raspravu o ovim dvjema tačkama.

U diskusiji su učestvovali Rizah Haračić i Jasmin Mušanović.

Rizah Haračić: je istakao zadovoljstvo Programom, kao i činjenicom da se počelo intenzivno razmišljati i rješavati problematiku parking prostora u gradskom području.

Jasmin Mušanović: također je pohvalio Program, te je potencirao pitanje gradnje javnog WC-a, odnosno neophodnosti takvog objekta u gradu.

Vijeće je usvojilo Izveštaj o realizaciji Programa utroška sredstava od komunalne naknade za 2018. godinu sa 23 glasova za, 2 protiv i niko uzdržan, a Program utroška sredstava od komunalne naknade za 2019. godinu sa 22 glasa za, bez glasova protiv i 3 uzdržana.

Tačka 15.

Prijedlog odluke o davanju na privremeno korištenje poslovnih prostora

Predlagač: Općinski načelnik

Obrađivač: Zavod za planiranje i izgradnju općine Kakanj

Izjavitelj: Zijad Neimarlija, direktor Zavoda

U diskusiji nije niko učestvovao i Vijeće je usvojilo Odluku o davanju na privremeno korištenje poslovnih prostora jednoglasno sa 26 glasova za.

Tačka 16.

Prijedlog programa rasporeda sredstava boračkim udruženjima za 2019. godinu 1

Tačka 17.

Prijedlog programa rasporeda sredstava boračkim udruženjima za 2019. godinu 2

Predlagač: Općinski načelnik

Obrađivač: Služba za društvene djelatnosti, boračka pitanja, raseljene lica, izbjeglice i povratnike

Izjavitelj: Rešad Zaimović, pomoćnik općinskog načelnika

Vijeće je vodilo objedinjenu raspravu o ovim dvjema tačkama.

U diskusiji su učestvovali Eldin Mijoč, Rizah Haračić i Slaven Katičić.

Eldin Mijoč: je naglasio da su značajna sredstva koja se izdvajaju za boračka udruženja i da je velika nesrazmjera između sredstava koja se izdvajaju za funkcionisanje udruženja i sredstava koja se dijele kao pomoć članovima istih. Smatra da bi prvobitan cilj predmetnog Programa trebao biti da se pomogne i olakša život borcima i članovima njihovih porodica, a ne da se finansiraju troškovi rada i funkcionisanja samih udruženja.

Rizah Haračić: je rekao da je i ranijih godina predlagao da se u okviru ovog Programa predvide sredstva za dokup staža borcima kojima je to potrebno, kako bi ostvarili uslove na penziju i na koji način bi se svake godine određen broj istih trajno riješio, odnosno obezbjedili im se uslovi za život.

Slaven Katičić: je rekao da nije dobro odvajati udruženja od boraca, te da je stvar organa samih udruženja da uredi sistem rada istih i poboljšaju kvalitet usluga, koje udruženja pružaju svojim članovima kao određen servis. Napomenuo je da na nivou Federacije i kantona postoje ministarstva koja raspolažu znatno većim sredstvima od onih planiranih ovim Programom, a čiji je osnovni cilj i zadatak da rješavaju problematiku boračke populacije.

Vijeće je nakon diskusije usvojilo oba Programa rasporeda sredstava boračkim udruženjima za 2019. godinu sa 23 glasa za, niko protiv i 3 uzdržana.

Tačka 18.

Prijedlog programa rasporeda sredstava za sport za 2019. godinu

Predlagač: Općinski načelnik

Obrađivač: Služba za društvene djelatnosti, boračka pitanja, raseljene lica, izbjeglice i povratnike

Izjavitelj: Rešad Zaimović, pomoćnik općinskog načelnika

U diskusiji su učestvovali: Safet Šahman, Eldin Mijoč, Evelin Bitić i Džemal Bećirhodžić.

Safet Šahman: je predložio da se iz rezervnih sredstava predvidi izdvajanje određenog iznosa za teniski savez ZDK, te da se povećaju iznosi sa 500 KM na 1.000 KM za sve klubove koji su Programom planirani da dobiju iznos od 500 KM.

Eldin Mijoč: je naglasio da su izdvajanja za sport mnogo veća nego u nekim ranijim godinama, ali da su kao takva polučila zavidne rezultate. Smatra da zbog visine iznosa koji se izdvaja za sport treba pronaći modalitet da roditelji ne plaćaju članarinu za svoju djecu niti u jednom sportskom klubu u Kakanju, kako bi

se predmetna sredstva pravednije raspodjelila, odnosno kako bi se omogućilo bavljenje sportom djeci koja su nadarena, a čiji roditelji nemaju sredstava da plate članarinu. Još je predložio da se iz predloženog iznosa sredstava izdvoji iznos od 50.000 KM na ime pomoći u razvoju i takmičenju posebno nadarenim sportistima, a prema podacima sportskog saveza općine, što bi bila nova stavka u Programu.

Evelin Bitić: je izrazio zadovoljstvo zbog visine iznosa koji se izdvaja za sportu Kaknju, kao i činjenicom koliki broj sportskih klubova dobije određena sredstva iz ovog Programa.

Džemal Bećirhodžić: je predložio u ime kluba SDA zaključak da se kakanjskim sportskim klubovima u cilju razvoja sporta u Kaknju, a imajući u vidu sjajne rezultate sportskih klubova, omogući korištenje bez naknade dvoranskih kapaciteta kojim upravlja JU „Kulturno-sportski centar“ Kakanj. Zadužuje se sportski savez općine Kakanj da u saradnji sa sportskim klubovima dostavi JU „Kulturno-sportski centar“ Kakanj, raspored treninga i odigravanja utakmica klubova koji su oslobođeni plaćanja troškova korištenja dvoranskih kapaciteta.

Rešad Zaimović: je rekao da će se iz sredstva rezervi, kao i u ranijim godinama, pomoći svakom pojedincu ili sportskom klubu u slučaju da se isti obrate sa opravdanim zahtjevom, kao i da će se iz istih sredstava finansirati takmičenja i razvoj nadarenih sportista, što je također bio slučaj u ranijim godinama.

Eldin Mijoč: je rekao da ostaje kod svog prijedloga za uvođenje nove stavke u Program, jer smatra da sredstva rezervi nisu dovoljna da se postigne puni efekat iznesenog prijedloga.

Vijeće je usvojilo Program rasporeda sredstava za sport za 2019. godinu sa 22 glasa za, 3 protiv i bez glasova uzdržanih.

Vijeće je jednoglasno sa 25 glasova za usvojilo zaključak da sportski klubovi budu oslobođeni plaćanja usluga dvoranskih kapaciteta JU „Kulturno-sportski centar“ Kakanj.

Tačka 19.

Izveštaj o realizaciji i utrošku sredstava ostvarenih po osnovu naknade za vatrogastvo u 2018. godinu

Tačka 20.

Prijedlog programa rasporeda i utroška planiranih sredstava od naknada za vatrogastvo u 2019. godini

Predlagač: Općinski načelnik

Obrađivač: Služba civilne zaštite

Izjestilac: Nurudin Hrusto, pomoćnik općinskog načelnika

Vijeće je vodilo objedinjenu raspravu o ovim dvjema tačkama.

Pošto nije bilo prijavljenih za raspravu Vijeće je jednoglasno sa 23 glasa za usvojilo Izveštaj o realizaciji i utrošku sredstava ostvarenih po osnovu naknade za vatrogastvo u 2018. godinu, kao i Program rasporeda i utroška planiranih sredstava od naknada za vatrogastvo u 2019. godini.

Sjednica se završila u 14:55.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić